

Anniaatit ippinnarunnaarsarlugit katsorsaanermut peqqissaasut ilinniarnerminnik nangitsinissaannut aningaasaliisoqarnissaanik Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen, Siumut)

Akissuteqaat

(Peqqissutsimut Attaveqarnermullu Naalackersuisoq, Steen Lynge)

1. Siullermeerneqarnera

Anniaatit ippinnarunnaarsarlugit katsorsaanermut peqqissaasut ilinniarnerminnik nangitsinissaannut aningaasaliisoqarnissaa pillugu Inatsisutunut ilaasortaq Doris Jakobsen siunnersuuteqarmat Naalackersuisut qutsaavigaat.

Katsorsarneqarsinnaanngitsumik napparsimasut sulisunit piukkunnaateqarluartunit piginnaasaqartuniillu paarineqarnissaat katsorsarneqarnissaallu pingaaruteqartorujussuuvoq, Naalackersuisullu sulisut piginnaasaasa ineriartorteqqinnissaannut peqataanissartik pingaartippaat katsorsarneqarsinnaanngitsumik napparsimasut taakkulu qanigisaaasa piartornerup nalaani oqinnerpaamik atugassaqartikkusullugit.

Nunatsinni peqqissaaveqarfinni, najukkani napparsimmavinni, nuna tamakkerlugu Dronning Ingridip Napparsimavissuani kiisalu kommunini utoqqaat illuini paaqqisariaqartullu angerlarsimaffiini ullumikkut nappaammik anniaatinik ippinnarunnaarsaalluni suliniummik tunngaviatigut suliniuteqartoqarpoq. Tamanna suliniutaavoq immikkut sammisassatut suliaanngitsaq, nappaatinik inuunermik ulorianartorsiortitsisunik katsorsarneqarsinnaanngitsunillu nappaateqarnermi anniaatinik annikillisaanissamut sammititaq.

Nunani allani nappaammik anniaatinik ippinnarunnaarsaanermut immikkut ittumik katsorsaanissamut neqeroortoqartarpoq. Taamatut napparsimasunut piartortunut paaqqinniffinni, anniaatinik ippinnarunnaarsaanermut immikkoortortani kiisalu sulisunut aallartartunut neqeroorutaavoq. Suliniut napparsimasup katsorsarneqarsinnaanngitsumik nappaateqartutut nalilerneraniit toqussaq tikillugu ajornartorsiutaasinnaasunut immikkut ittunut sammitinneqarpoq. Nunatsinni massakkorpiaq immikkut suliamik neqeroortoqarneq ajorpoq, tamatumanili pisariaqartitsineq annertusiartortut nalilernerarpoq inuit amerliartuinnartut katsorsarneqarsinnaanngitsumik napparsimasut inuusarnerat sivitsoriartuinnarmat.

Peqqissutsimut Naalackersuisoqarfimmi napparsimasunut piartortunut paaqqinniffimmik pisariaqartitsisoqarnera pillugu siunnersuummut atasumik 2012-imi ukiakkut anniaatinut

ippinnarunnaarsaanermut tunngasunut tassanilu suliniuteqarnissaq pillugit misissueqqissaarnermik aallartitsisoqarpoq. Susassaqarfik pillugu nassiuammik UPA 2014-imi saqqummiisoqarnissaa naatsorsuutigineqarpoq. Taamaamat peqqissaasut ilinniarnissaannut neqeroorutit pillugit siunnersuut matumani pineqartoq anniaatinut ippinnarunnaarsaanerup suliniutigineqartup ineriartortinnissaanut sammisumut attuivoq. Tassunga atatillugu ilinniarnissamut suliniutit katsorsarneqarsinnaangitsumik napparsimasut paaqqtarinerisa nakorsarnerisalu pitsaassusaannut annertuumik iluaqutaassapput. Misissueqqissaarnermik suliaqarnejq anniaatinik ippinnarunnaarsaanissamik suliniutip siunissami qanoq isillugu aaqqissuunnissaanut piareersarnissaanullu inaasutigineqartunut sunniuteqarnissaa ilimanarpoq, tassunga aamma ilaalluni ilinniarnerup tungaatigut suliniutit sorliit susassaqarfiup iluarsiniarneranut pisariaqartutut isigineqarnersut.

Naalackersuisoqarfiup anniaatinik ippinnarunnaarsaanermik suliniut susassaqarfiit akimorlugit suliniutitut isigaa, tamatumani peqqissaasut kisimik pinnatik suliassamik ilisimasallit tamarmik peqataatinneqarmata. Taamaalisoqarnerani tunngaviusumik suliniutit iluanni sulisunik qaffassaanermi peqqissaasut kisimik attorneqanngillat, kisianni aamma ilisimasaqartut allat eqqorneqarlutik, siunnersuummilu ilisimasaqartut aalajangersimasut kisimik isiginiarneqarmata susassaqarfiup iluani ilinniarnissamik pisariaqartitsineq tamarmiusoq siunnersuummi attorneqanngilaq.

Massakkorpiaq peqqissaasut nunatsinni nunanilu allani sivikitsumik sivilunerusumilluunniit pikkorissarnissaminnut ilinniarnissaminnuunniit periarfissaqarluarput. Tamanna qulakkeernejqarpoq peqqinnissaqarfimmi kommuninilu ilisimasaqartunut attuumassuteqartunut isumaqatigiinniarnertit aqutugalugit isumaqatigiissuteqarnikkut.

Tamatuma saniatigut Peqqissutsimut Attaveqarnermullu Naalackersuisoqarfik Ilinniaqqinnissamut aningaasaliisarfimmik aqutaqarpoq immikkut ilisimaqarlutik peqqinnissaqarfimmi, Peqqinnissaqarfimmi Ilinniarnernut Qitiusumik Ilinniarfimmi kiisalu Peqqissaanermut Peqqissutsimullu Ilisimatusarnermut Ilisimatusarfiup immikkoortortaqarfiani sulisunit qinnuteqarfigineqarsinnaasumik. Anniaatinik ippinnarunnaarsaneq atorlugu napparsimasunik paaqutaqarnermut tagiartuillunilu peqqissaanermut pikkorissartitsinissamik Peqqissaanermik Ilinniarfimmiit neqeroorutaasumik pilersitsisoqarnikuuvoq, taannalu peqqinnissaqarfimmi, utoqqaat illuini assigisaannilu sulisut tamarmik suliat akimorlugit pikkorissarnissaannut neqeroorutaavoq.

Tamanna tunngavigalugu siunnersuutip itigartitsissutigineqarnissaa Naalackersuisut inassutigaat.